

四庫全書

集部

欽定四庫全書

集部
元藝圃集卷一

詳校官中書臣陸湘

侍讀臣孫球覆勘

總校官檢討臣何思鈞

校對官編修臣盧燧

謄錄監生臣李世麟

欽定四庫全書

集部八

元藝圃集

總集類

提要

臣等謹案元藝圃集四卷明李袞編此集續宋詩而選所錄凡一百八人詩六百二十五首自序稱地僻少書籍無以盡括一代之所長今觀所錄有虞集范梈揭傒斯而無楊載即一代名人號為四家者已闕其一是漏畧

誠所不免又劉辰翁乃宋人王庭筠高克恭
元好問乃金人僧來復乃明人一例載入頗
失斷限其編次則倪瓚宋元余闕等皆元末
人而名在最前戴表元白珉等皆元初人而
名在最後其他亦多先後顛倒頗無倫序似
亦隨見隨抄未經勘定之本與宋藝圃集相
同殆慵于排纂遂用唐無名氏搜玉小集不
拘時代之例歟然其自序謂宋詩適于理元

詩鄰于詞則深中兩代作者之弊故其去取
之間頗為不苟以云備一代之詩誠為不足
以云鑒別則較之泛濫旁收務盈卷帙者精
審多矣乾隆四十六年二月恭校上

總纂官

臣

紀昀

臣

陸錫熊

臣

孫士毅

總校官

臣

陸費墀

欽定四庫全書

提要

元藝圃集原序

余既選宋詩已人有以元詩為問者余應之曰宋詩深刻而痼於理元詩膚俚而隣於詞是二者其弊均也而學人之辨於理也為尤難詩有至理而理不可以為詩而宋人之謂理也固文字之辨也箋解之流也是非褒貶之義也茲其於風雅也遠矣詞固詩餘也雖膚俚猶有故也達於此可與言詩矣因間鈔元詩得六百二十五首曰元藝圃集以嗣宋後恨地僻少書籍無以盡括

一代之所長世有博雅君子幸廣其所未備也萬厯十
年壬午五月八日

欽定四庫全書

元藝圃集卷一

明 李荦 編

劉因

西山

西山澹無姿中有羲皇前翻思太古人事業何不傳三
墳亦何罪世遠成灰烟紛紛後來人暮死朝爭妍勲名
史一策學術文千篇古人豈不然後有無窮年惟餘方

寸心天地相後先

會隱山

鳴禽變初節白雲思高山笑拊蒼然石為謝區中緣舉
杯屬何人四顧心茫然雲烟互吞吐巖壑如相先人間
此幻境過眼成千年山家有酒令飲外可無言

隱仙谷

山川含太古風氣如未開中有幽棲人日暮斲蒼苔吾
曾素義皇人世不可諧此地復何地恍若登春臺山局

掩對峙石徑迷縈回桑麻連水竹屋宇依山厓燕南避
世謠千古知我懷橫渠百世師一區竟相乖知音得元
老龍門有遺齋賤子孤旅人念此良悠哉於世豈有望
居山亦無媒舉杯對山靈欲去仍徘徊他年要勝跡此
駕當招來

泛舟西溪

萬山倒滄浪一葉凌嵯峨嵯峨為飛舞翠影如婆娑輕
陰散雨足淨綠生圓波人間碧海幻老眼青銅磨風雲

金定四庫全書
卷一
幾千古辨此雨一蓑溪南有幽人鼓棹前山阿烟深渺
無處月色浮松蘿

白蓮

冰華離風塵素質更深靜灝露凝幽香皎月散清景誰
並絕世姿澹然水中影青芳生苦心秋風逼涼冷安得
同愛人共此良夜永

和歸田園居

少小不解事談笑論居山為問五柳陶栽培幾何年安

得十畝宅背山復臨淵東隣漢陰圃西家鹿門田前通
仇池路後接桃源間熙熙小國樂夢想羲皇前石上無
禾生粲爛空白烟營營區中民擾擾風中顛未論無田
歸歸田誰獨閒迂哉仲長統論說徒紛然

和連雨獨飲

吾心物無競未醉已頽然乾坤萬萬古坐我春風間弱
女亦何知挽衣呼我仙窺人簷鳥喜共舞風雪天舉觴
屬羲皇身在太古先忽遇弄丸翁見責久不還一笑了

無間今夕是何年遙遙望白雲欲辨已忘言

和飲酒

士窮失常業治生誰有道身心自勞齒壯髮先老客
從東方來溫言慰枯槁生事仰小園分我瓜菜好指授
種藝方如獲連城寶他年買溪田共住青林表

和擬古

客從關洛來高論聽未終連稱古英傑秉國或從戎建
立天地極蔚為蓋世雄功成脫敝屣飄然薊遺風生世

此不惡君何守賤窮急呼酌醇酒延客無何中

同遊非所思所思天一隅有問所思誰意在不言舒古
今猶旦暮四海同一廬恍惚精靈通似見與我居攬衣
欲從之寒月照平蕪茫然不知處歎息將焉如

翩翩誰家子慷慨歌遠遊忽記少年日猛志隘九州何
物能勸人有此歲月流君心海無底亦使成高丘瞻君
一卷書其傳自衰周讀此當自悟擾擾將焉求

和雜詩

朝耕隆中田暮採成都桑平生淡泊志醜女同糟糠愛
此真丈夫忘我厨無糧當年靜修銘團茅雞距陽回頭
十五載塵跡徒自傷山居久岑寂主靜豈無方安得無
極翁酌我上池觴

雞距保府泉名
有靜修龕在焉

采菊圖

天門折翼不再舉袖手四海橫流前長星飲爾一杯酒
留我萬古羲皇天廟堂衮衮宋元勲爭信東籬有晉臣
南山果識悠然處不惜寒香持贈君

抱陽南軒

下瞰縣崖老木稠輕風毛髮散涼秋蒼苔白石夢初覺
霽月疎雲山欲流

銅雀瓦硯

諸侯負漢已堪憐直筆何為亦魏編却愛曹瞞臺上瓦
至今猶屬建安年

仙人圖

千古誰傳海上山坐令人主厭塵寰蓬萊果有神仙在

應悔虛名落世閒

春景

病餘身世淡無情但覺春來暖漸生
送客出門花已謝
問知昨日是清明

今月

今月柴關幾客來擬從屐齒數莓苔
求文道士花前至
載酒門生雨後回

觀梅有感

東風吹落戰塵沙
夢想西湖處士家
只恐江南春意減
此心元不為梅花

山家

馬蹏踏水亂明霞
醉袖迎風受落花
怪見溪童出門望
鵲聲先我到山家

溪上

坐久蒼苔如見侵
攜筇隨水就輕陰
松風自厭灘聲小
雲影旋移山色深

西郊

偶因訪客出西城一色寒蕪滿意平
行過溪橋嘗脚力招來野老問山名

春盡

草閣垂簾晝掩扉客來知我出門稀
鳥鳴淡與人相對花落方知春已歸

寒食道中

簪花楚楚歸寧女荷鍤紛紛上塚人
萬古人心生意在

又隨桃李一番新

廢園

路傍雙石立崔嵬曾見遊人幾往來
想得當年全盛日
好山橫處盡樓臺

庚辰元日

曾記西湖酒一卮乾坤和氣入新詞
六年未盡冰霜怨
又到春風滿面時

飲山亭雨後

山如翠浪經雨漲開軒宛坐扁舟上西風為我吹拍天
要駕雲帆恣吾往太行一青才遇先生醉眼醒
却笑劉伶糟麴底豈知身亦屬螟蛉

陳氏莊

陳氏園林千戶封晴樓水閣圍春風翠華當年此駐蹕
太平天子長楊宮浮雲南去繁華歇回首梁園亦灰滅
淵明亂後獨歸來欲傳龍山想愁絕今我獨行尋故基
前日家僅白髮垂相看不用吞聲哭試賦宗周黍離

離

觀雷溪

飛狐天下脊老氣盤互回三江瀉天怒合為一水東南
來此勢不殺令人愁石門喜見西山開未補青天裂誰
鑿混沌胎奇聲猛狀萬萬古山根幾許猶崔嵬西山倒
傾瀾百丈逢巔崖先聲動毛髮餘爽開襟懷初疑萬壑
轉奔石意像髣髴坤軸摧又疑鼓角鳴地中百步未到
仍徘徊荒祠下石磴駭目何雄哉春風不到太古雪今

日乃得胸中雷穿石誰能窮窟宅流沫勢欲浮蓬萊平
生芥蒂今寒灰兩耳到骨無纖埃酈元筆頭天下水石
門之奇猶見推乃知茲遊亦奇絕快弄素電噴瓊瑰東
嵬一片石坐撫千年苔為招郎山君共捲長鯨杯江妃
為撾靈鼓催赤鯁躍出銀山堆先生醉來泉灑面狂歌
一和湍聲哀

浙江潮圖

山人懶絕夢亦然鼎如萬牛不可遷誰信畫工筆頭有

神力扁舟一夜江聲寒覺來千里雪漫漫中有數點青
峨閒人間天上壯觀已如此豈知大塊喘息四海如鼻
端海中仙人冰雪顏吸風御氣非人寰試問濤頭何當
還為我寄聲三神山我欲乘興遊其間

早秋

昨朝一葉見秋生今日千巘萬壑清欲借西風蘇病骨
暫來石上聽松聲

翟節婦詩

欽定四庫全書

元嘉懷身
卷一

兵塵浩無際烈女難自全婦人無九首志欲不二天燕
山翟氏女既嫁夫防邊一朝聞死事健婦增慨然生有
如此夫早寡非所憐求尸白刃中負土家山前事去哀
益深義盡身可捐無兒欲何為所依惟黃泉鄉人掾引
決烈日丹衷懸誰辨節孝翁重賦睢陽賢我昨過其鄉
山水猶清妍聞風髮如竹飄蕭動疎烟千年吟詩臺我
我大寧巔為招馮大師和我節婦篇

白馬篇

白馬誰家子翩翩秋隼飛袖中老蛟鳴走擊秦會之事
去欲名留自言臣姓施二十從軍行三十始來歸矯首
望八荒功業無可為將身弭大患報効或在茲豈不知
非分常恐負所期非干復讐怨不為酬恩私偉哉八尺
軀膽志世所希惜此博浪氣不遇黃石師代天出威福
國柄誰當持匹夫赫斯怒時事亦堪悲

秋晚登西山

十日罷琴誦招搖慕飛仙天風何許來吹我蒼崖巔誰

知此絕境秋華亦芳鮮采采泛清樽山容變春妍只應
城中人遙知弄雲烟若見孤鴻來可咏悠然篇

送徐生還鄂

燕山送客歸南州興來每恨無扁舟君歸我爲謝江漢
思君不見令人愁千里風烟想瀟洒一代英雄成古丘
當年氣力鸚鵡洲撫掌笑殺黃鶴樓黃鶴歸來哀江頭
江山依舊人悠悠浮雲萬古恣變滅眼中擾擾何時休
紫陽仙人歌遠游飛蛟起滅三千秋爲君揮手崑崙頭

蠡吾翁王畫像

北門翠屏雷破山畢逋頭白五馬遷乾坤運會到血肉
有欲托之誰飛仙河朔諸州尤可憐有饑以來無此年
鄉閭嗷嗷公哺之公固有底心無邊諸豪推讓彼亦義
亂世性命公能全教子讀書不求官歸來素髮家山前
天理不隨陵谷變坐看老樹生蒼烟只今圖畫對公像
回首兵塵一慨然誰能生死太平日白石共煮西山前

宋高宗題李唐秋江圖

秋江吞天雲拍水濤借西風扶不起斷雲風雨入江村
回首龍沙幾千里澹菴老筆搖江聲髣髴阿唐慘淡情
千秋萬古青山恨不見歸舟一葉橫

金太子允公墨竹

黑龍江頭氣鬱葱武元射龍江水中江聲怒號久不瀉
破墨揮洒餘神功天人與竹皆真龍墨竹以來凡馬空
人間只有墨君堂何曾夢到瓊華宮瑤光樓前月如練
倒影自有河山雄金源大定始全盛時以漢文當世宗

興陵爲父明昌子樂事孰與東宮同文采不隨焦土盡
風節直與幽蘭崇百年圖籍有蕭相一代英雄推蔡公
策書紛紛少顏色空山夜哭遺山翁我亦飄零感白髮
哀歌對此吟雙蓬秋聲蕭蕭來晚風極目海角天無窮
黑龍江見金史幽蘭軒義宗死所汴亡張蔡公以金寶
鉢歸遺山當就公謄錄此軸亦公得於汴之中秘者公
之子仲仁持以求
余詩故終篇及之

登鎮州隆興寺閣

太行鱗甲搖晴空層樓一夕蟠白虹天光物色驚改觀

少微今在青雲中初疑平地立梯磴清風西北天門通
又疑三山浮海至載我欲去扶桑東靈華寶樹忽當眼
拍肩愛此金仙翁金仙一夢三千載騰擲變化天無功
萬象繞口恣噴吐坐令四海皆盲聾千池萬沼盡明月
長天一碧無遺蹤我生玄感非象識此眼此臂將安庸
海嶽神光埋禹鼎人間詭態何由窮金天月窟爾鄉國
玉毫萬丈須彌峰一杯徑欲呼與語為我返駕隨西風
堂堂全趙思一豁江山落落吾心胸中原左界此重鎮

形勢彷彿餘兵衝歌舞遺臺土花碧旗幟西山霜葉紅
乾坤割裂萬萬古烏鳶螻蟻為誰雄滄水悠悠自東注
落日渺渺明孤鴻

張元帥寶刀

土不產金人氣雄真人握鐵開鴻濛不知此刀何所得
風烟餘烈來霜鋒將軍聲名今蔡公酒酣遇我歌彤弓
持刀對公兩奇絕眼中已覺南江空水波江聲浩無窮
朝暮夕淬天有工回鶻健兒戲天巧前身鐵精非凡庸

紫烟焰焰天為紅
綰紋秀發青芙蓉
寶鏤搖落初開封
四壁如著清水中
天山積雪聚鋸鏑
寒色直欲朱崖通
摩挲神物三太息
此行善保千年功

雪浪石

邵家水陸說影象
一物自可涵無垠
滄浪山人歌感應
石中固有此理存
老坡胸中如此幾
硯磊須得銀河噴
朝嵩唾華天不嗔
武夷赫怒張吾軍
偶從北海得生氣
竹石也愛風姿新
我來正當秋雨霽
一杯冥漠玄都門

小璫好事如先臣坐令平地石生根渠家兒戲解忘國
作詩一笑君應聞

食筍

夢回齒頰風蕭颯幽姿不許霜風高南來蒼玉不盈束
已覺飲興翻雲濤詩家胸次自宜此尚嫌烟火須烹煎
想像南方吹萬竹籜龍正恐稱冤號石盆養魚心自苦
仰羨鸛鵒雲門巢眼中歲旱土不膏長鑱復慮山無毛
退食歸來北窗夢山顛未鳳聲嗷嗷

三月三日許天祥置酒東城

都門氣習豪翩翩此君尊俎今宛然
春色今年遲半月留待怱怱過寒節
臨流雅唱尋舊盟青眼青天對今夕
橫橋綺服麗人天蒼苔坐我羲皇前
花枝華髮兩如許天意時情一杯舉
安石起舞元龍歌蒼生我竟如渠何

飲仲誠椰瓢

君家瓠落無所容江湖誰辨平生胸
海南佳氣久鬱塞滌瀕似喜今相逢
前年對酒面發紅今年對酒氣如虹

江山萬古騷人國跬步便與華胥通河間古儒病我拘
我聞一飲喜氣濃平生得意南湖張此意頗與河間同
太古窪尊老無底一朝傾倒何由供醉鄉千年有此客
鳥歌蝶舞春濛濛醉翁之意不在酒宛如琴意非絲桐
太和風景無酩酊洛陽樓閣高玲瓏冷然仙馭一杯水
眼中渺渺無極翁西家伯倫替且聾東家醉死王無功
酒中醒境渠未識冰壺秋月崑崙峰舉杯喚月來胸中
人間白日浮雲空五嶺山高雲幾重朱崖滅沒南飛鴻

玄鶴翩翩渺何許
操瓢徑訪眉山公

郭氏家山圖

鹿門烟景接隆中
翁媪通家社酒紅
只有山童最神駿
舊曾床下拜龐公

明遠堂賞蓮醉賦

畫堂香遠凝清秋
宛如坐我南湖舟
主人愛客情亦重
謂我無語花應羞
荷香繞筆詩自健
滿紙已覺清江流
平生老氣回萬牛
為君傾倒元龍樓
舉杯喚起謝安石

我醉不省蒼生憂

記夢

天風吹雲送星槎
蒼鱗道前牽紫霞
鳳凰呈舞月妃和
飄飄來自金母家
金母臨行有奇贈
玉簫瑤管聲清佳
囑我醒時無泄露
恐世知子生喧嘩
明朝夢覺莫驚怪
異香冉冉浮窗紗

送國醫許潤甫還燕

燕趙豪傑窟馬遷
曾此求交遊
即今勁氣壓河朔
人物

傑出嶄然雄九州燕南子許子胸盤星斗橫高秋窮則
良醫達良相古人須向今人求萬里黃雲馬上家歸來
淚滿銀貂裘民病未蘇國支朽勿以一身戚而忘天下
憂古來奇士重意氣把臂一語肝膽投君能搜我胸中
磊落之奇才我亦為君寫我抑鬱之幽懷

元好問

緱山置酒

靈宮肅清曉細栢含古春人言王子喬馭鶴此上賓白

雲山蒼蒼平田木欣欣登高覽元化浩蕩融心神西望
洛陽城大路通平津行人細如蟻擾擾爭紅塵蓬萊風
濤深鬢毛日夜新殷勤一杯酒愧爾雲間人

光武臺

漢南地上遊荆楚兵四衝遊子十月來登高送長鴻當
年赤帝孫提劍起蒿蓬一顧渚水斷再顧新都空雷霆
萬萬古青天看飛龍巋然此遺臺落日荒烟重誰見經
綸初指揮走羣雄白水日夜東石鱗幾秋風空餘廣武

歎無復雲臺功

出京

從宦非所堪長告欣得請驅馬出國門白日觸隆景半
生無根著飄轉如斷梗一昨隨牒來六月阻歸省城居
苦湫隘羣動日蛙黷慚愧山中人團茅遂幽屏塵泥免
相浣夢寐見清潁矯首孤飛雲西南路何永

示姪孫伯安

伯安入小學穎悟非凡兒屬句有夙性說字驚老師見

汝挾書歸憶我青衿時青衿昨日耳齒髮忽如茲讀書
誤人多濶疎亦天資元無倚天劍可斷扶桑枝倚梯望
青冥愚者知笑之壯事已無取老謀欲何施幸此掌中
孫未染如素絲就令好紙筆門戶誰當支我有商於田
爾壯可耘耔便當學種樹未用城南詩

雜詩

世事如大弩人若材官然乘勢易發機非時勞控弦又
如大水中置彼萬斛船雖有帆與槳亦須風動天不見

周公瑾弱齡已飛騫不見師尚父鷹揚在華顛彼非生
而材此豈晚乃賢鑑基喻智慧要必有待焉嘆息狂馳
予嘗為愚者憐

五松坪

竹港晨露白石門秋氣寒湍流落澗壑細路深茅菅江
平白石出竟日沿清灣四顧不見人山鳥時間闌蒼岷
入地底烟靄青漫漫力盡不能過却坐空長歎青天白
雲間可望不可攀虛名竟何得行路乃爾難

曉發石門渡湍水道中

疎星澹秋明陰霞絢朝映積雨成坐愁晨光動幽興石
門歸馭引湍浦漁舸並曠蕩萬景新歸藏四山靜平湖
風漪綠遠岼秋沙淨洋洋游鯨逝汎汎輕鷗泳隱顯垂
夙心感遇見真性倦遊徒自悼達已將安竟憂端從中
來茫茫發孤詠

放言

韓非死孤憤虞卿著窮愁長沙一湘纍郊島兩詩囚人

生定能幾肺肝日相讐井蛙奚足論袴蝨良足羞正有
一朝樂不償百年憂古來帝王師或從赤松遊大笑人
間世起滅真浮漚曾是萬戶封不博一掉頭有來且當
避未至吾何求悠悠復悠悠大川日東流紅顏不假惜
素髮忽已稠我欲升嵩高揮杯勸浮丘因之兩黃鵠浩
蕩觀齊州

別李周卿

城居日蛙黽局促復局促去作山中客放浪誰檢束溪

光淡於水山骨淨如玉懷我同心人園茅住深竹垂綸
鮮可食種秫酒亦足石壇三萬丈醉眼天一粟安得萬
里風相從兩黃鵠

九日讀書山用陶詩露淒暄風急氣清天曠明韻
行帳適南下居人跼庭戶城中望青山一水不易渡今
朝川涂靜偶得展衰步蕩如脫囚拘廣莫開四顧半生
無根著筋力疲世故大似丁令威歸來歎墟墓鄉里喪
亂久觸目異平素枌榆雖尚存歲晏多霜露

今日復何日霜露倏已淒登高有佳招山中古招提翩
翩劉公子王田重相携乾坤動詩興澗壑忘攀躋霍侯
家甚貧劣有酒與雞城居厭輦鼓移家此幽棲世網不
易逃所向皆塵泥何以濯我纓林間有清溪

山腰抱佛刹千里望家園亦有野人居層岷映柴門昔
我東岩君曾此避塵喧林泉留杖履歲月歸琴樽翁今
為飛仙過眼幾寒暄蒼蒼池上柳青衫見諸孫疎燈照
茅屋新月入顏垣依然覽陳迹惻愴不能言

霜氣一區薄杳杳秋山空臨高望烟樹黃落雜青紅造
物故放縱窮秋變春容錦帳三百里不盡臺山東粲粲
黃金華羅生蒿艾叢野人不知貴幽香散秋風秋物自
橫陳顧揖苦不供誰能搖醉筆吐句凌清雄

宇宙有此山閱世過烏疾何人不此遊名姓寧復識茲
辰世所重前代多盛集柴桑有故事二謝留俊筆併數
益與桓此外誰記憶人生百年內踏地皆陳迹獨惟我
輩人興懷念今昔山林與皋壤自古長太息

我在正大初作吏浙江邊山城官事少日放浙江船菊
潭秋華滿紫稻釀寒泉甘腴入小苦幽光出清妍歸路
踏明月醉袖風翩翩父老遮我留謂我欲登仙一別半
山亭回頭餘十年江山不可越目斷西南天

讀書山月夕

層岷多古木細路深莓苔柴門開曉日雲際青山來靜
中有真趣孤賞何悠哉

久旱雨亦好既雨晴亦佳胡床對明月樹影含清華墻

東有汚池欹枕聽鳴蛙

送郝講師住崇福宮

大方之家幾知津
郝君七十老斲輪
書文五車喙三尺
劇談混沌今猶神
太玄博士爲絕倒
君言夸矣天公嗔
長安冠蓋羅青雲
洛陽車馬爭紅塵
怪君掉頭不肯住
寂寞來作山東隣
崧高維岳古所秩
三十六帝有外臣
玄都石壇待飈馭
宮殿突兀松輪囷
上界仙人登雲山
洞天治所名司真
蓬萊方丈去不遠
明星玉女時相親

瑤華可擷蘭可紉烟霞永隔塵中人黃鵠一去不復返
白鷗萬里誰能馴為我殷勤謝鄧君玉華歲晚當平分
范寬秦川圖

亂山如馬爭欲前細路起伏蛇蜿蜒秦川之圖范寬筆
來從米家書畫船變化開闔天機全濃淡覆露清而妍
雲興霞蔚幾千里著我如在峨眉巔西山盤盤天與連
九點盡得齊州烟浮雲未清白日晚矯首四顧心茫然
全秦天地一大物雲雨瀕洞龍頭軒因山分勢合水力

眼底廓廓無齊燕，我知寬也不辦此渠寧。
有筆如修椽，紫髯落落西溪君。
長劍倚天冠切雲，望之見之不可親。
元龍未除湖海氣，李白豈是蓬蒿人。
愛君恨不識君早，乃今得子胸中秦。
作詩一笑君應聞。

赤壁圖

馬蹄一蹴荆門空，鼓聲怒與江流東。
曹瞞老去不解事，誤認孫郎作阿琮。
孫郎矯矯人中龍，顧盼叱咤生雲風。
疾雷破山出大火，旗幟北捲天為紅。
至今圖畫見赤壁，

髣髴烟燼留餘蹤令人長憶眉山公
載酒夜俯馮夷宮
事殊興極憂思集天淡雲閒今古同
得意江山在眼中
凡今誰是出羣雄可憐當日周公瑾
憔悴黃州一禿翁
半山亭招仲梁飲

孤城鬱鬱山四周外人乍見如纍囚
半山亭前浙江水
只可與君消百憂江山百年有此客
雲樹六月生涼秋
世上紅塵爭百日一丘一壑去來休

鄧州城樓

鄧州城下湍水流
鄧州城隅多古丘
隆中布衣不復見
浮雲西北空悠悠
長鯨駕海波立老
鶴呼月蒼烟愁
自古江山感遊子
今人誰解賦登樓

太白獨酌圖

謫仙去世三百年
海中鯨魚渺翩翩
豈知龍眠天馬筆
忽有玉樹秋風前
金鑾歸來身散仙
世事悠悠白髮邊
會稽賀老何處在
千里名山入酒船
清景已隨詩句盡
風流合向畫圖傳
往時長安酒家眠
焦遂不狂張不顛

想得三更風露下醉和江月弄江烟

劉遠筆

老銳力能舉玉杵文陣挽強猶百鈞惜哉變化太狡獪
嚮也褐衣今虎文宣城諸葛寂無聞前後兩劉新冊勲
謝郎神鋒恨太雋雖然豈不超人羣三錢雞毛吐皇墳
尖奴定能張吾軍何時酌我百壺酒為汝醉草垂天雲
劉時舉節制雲南

雲南山高去天尺漢家弦聲雷破壁九州之外更九州

海色澄清映南極幽并豪俠喜功名吐嗟顧盼風雲生
今年肘後印如斗過眼已覺烏蠻平諭蜀相如今老矣
不妨銅柱有新名

段志堅畫龍為劉鄧州賦

豬龍可豢亦可屠世人畫蛇復畫魚天飛忽入阿堅筆
始覺衆史欺庸愚腥風萬里來白浪橫江湖一麾走海
若再顧失天吳浩蕩明河翻尾鬣慘不濡只愁紙上出
雷火搏空大千如此珠天生神物與化俱滅沒變見何

金匱山志 卷一
所無逆鱗自古不受觸乃今縮頭隨卷舒怪得堂堂髯
御史平生長有雨隨車

湧金亭同遊諸君

太行元氣老不死上與左界分山河有如巨鼇昂頭西
入海突兀已過餘坡陀我從汾晉來山之面目腹背皆
經過濟源盤谷非不佳烟景獨覺蘇門多湧金亭下百
泉水海眼萬古流山阿騰沸灤水源滄淪晉溪波雲雷
涵鬼物窟宅深蛟鼉水妃簸弄明月璣地藏發泄天不

訶平湖油油碧於酒雲錦十里翻風荷我來適與風雨
會世界三日漫飛羅小行不得山北望空長哦今朝一
掃衆峰出千鬟萬髻高我我空青斷石壁微茫散烟蘿
山陽十月未搖落翠蕤雲旗相蕩摩雲烟故為出濃淡
魚鳥似欲留婆婆石間仙人迹石爛迹不磨仙人去不
返六龍忽蹉跎江山如此不一醉撫掌笑煞孫公和長
安城頭烏鵲訛并州少年夜枕戈舉杯為問謝安石蒼
生今亦如卿何元子樂矣君其歌

金門集卷一
天門引

秦王深居不得近從破衡成欲誰信白頭遊客困咸陽
憔悴黃金百斤盡海中仙人黃鵠舉大笑人間爭腐鼠
丈夫何意作蘇秦六印才堪驚兒女古來多為虛名老
不見阿房淨如掃千年虎豹守天門一日牛羊卧秋草

蛟龍引

古劍咸陽墓中得扶開青雲見白日蛟龍地底氣如虹
土花千年不敢蝕洪鑪烈焰初騰精橫海已覺無長鯨

世上元無倚天手匣中誰解不平鳴割城恨不逢相如
佐酒恨不逢朱虛尚方未入朱雲請盟盤合與毛生俱
誰念田文坐中客只將彈鋏嘆無魚

芳華怨

娃兒十八嬌可憐亭亭裊裊春風前天上仙人玉為骨
人間畫工畫不出小小油壁車軋軋出東華金縷盤雙
帶雲裾踏雁沙一片朝雲不成雨被風吹去落誰家少
年豈無恩澤侯金鞍綉帽亦風流不然典取鸛鸛裘四

壁相如堪白頭金谷樓臺悄無主燕子不來花著雨只
知環佩作離聲誰向琵琶得私語無情瀾瀾翡翠兒有
情蜂雄蛺蝶雌勸君滿酌金屈卮明日無花空折枝

征人怨

瀚海風烟掃易空玉關歸路幾時東塞垣可是秋寒早
一夜清霜滿鏡中

隋故宮行

渭川楊柳先得春二月鶯啼百轉新長春宮中千樹錦

暖日晴雲思煞人
君王半醉唱吳歌
絳仙起舞嚙翠蛾
吳兒謾說曾行樂
三十六宮能幾多
千秋萬古金銀闕
海沒三山一毫髮
繁華夢覺人不知
留得寒蟬泣秋月

解劍行

古劍黑於漆
鬱鬱動星文
摩挲二十年
今日持贈君
長鯨鼓浪三山沒
知君不是泥中物
袖中一卷白猿書
未分持刀賣黃犢
壯懷風雲鬱沉沉
慚愧漂母無千金
長安侏儒飽欲死
萬古不解天公心
北風浩浩吹行客
隴

水無聲雪花白荆卿墓頭秋草乾
擎筑行歌欲誰識君
不見秦相五羖皮去時烹雞炊廋
庖又不見敝裘蘇季
子合從歸來印累累丈夫隨地自有
萬里氣翕忽變化
安能知大冠如箕望吾子富貴同生
亦同死

春風來

春風來時瑤草芳綠池
珠樹宿鴛鴦春風去後瑤草歇
來鴻去燕遙相望鴛鴦不得雙
燕鴻天一方娟娟愁眉
色靜與遙山長錦衾覆羅薦
夢語相思怨月明烏夜啼

空閨淚如霰

送登封張令西上

罷縣人稱屈悠悠復此行
渭城秋雁到秦嶺暮雲平
道路衣從典風塵劍已鳴
山西多俠客莫說是書生

孟州夾灘飲承之御史家

美酒禁愁得芳梅發興饒
紛紜聊且置醜磊故須澆
雞黍成前約干戈有此宵
平生揚大理惜不與佳招

送曹吉甫兼及通甫

意氣羨君豪
憐君屈騎曹
安能事筆硯
且復混弓刀
風雪貂裘暗
關山馬骨高
南飛見鴻鴈
應為惜哀勞

落魄

落魄宜多病
艱危更百憂
雨聲孤館夜
草色故園秋
行役魚鰕尾
歸期烏白頭
中州遂南北
殘息付悠悠

酬中條李隱居邦彥

州路限南北
相逢今白頭
蟲沙非故國
人物自名流
學道慚高步
留詩惜暗投
歸秦如有便
終伴竹林遊

京兆漕司官居

符節推通貴江山入勝遊名園隨地改高棟與雲浮簿
領歸閒暇鶯花接獻酬不知秋夜月何似庾公樓

橫波亭

孤亭突兀挿飛流氣壓元龍百尺樓萬里風濤接瀛海
千年豪傑壯山丘疎星淡月魚龍夜老木清霜鴻鴈秋
倚劍長歌一杯酒浮雲西北是神州

度太白巔住昆陽

斷崖絕壁裂蒼巔
竟日長林窈窕間
舊許烟霞歸白髮
悔隨塵土出青山
饑螭澱澱催人老
野鶴昂昂羨汝閒
畏景方隆路方永
南風回首暮雲還

昆陽

古木荒烟集暮鴉
高城落日隱悲笳
并州倦客初投迹
楚澤寒梅又過花
滿眼旌旗驚世路
閉門風雪羨山家
忘憂只有清樽在
暫為紅塵拂鬢華

中山寒食

小雨班班浥曙烟
平林簇簇點晴川
清明寒食連三月
潁水崧山又一年
樂事漸隨花共減
歸心長與鴈相先
平生最有登臨興
百感中來只慨然

除夜

一燈明暗夜如何
夢寐衡門在澗阿
物外烟霞玉華遠
花時車馬洛陽多
折腰真有陶潛興
扣角空傳甯戚歌
三十七年今日過
可憐出處兩蹉跎

劉光甫內鄉新居

豸冠平日凜秋霜老去聲名只閉藏父老漸來同保社
兒童久已愛文章蔬隨隙地皆成圃竹放新梢欲過牆
為向長安舊遊道世間無有北窗涼

秋夜

九死餘生氣息存蕭條門巷似荒村春雷謾說驚坯戶
皎日何曾入覆盆濟水有情添別淚吳雲無夢寄歸魂
百年世事兼身事樽酒何人與細論

送輔之仲庸還大梁

驂駟爭道渺翩翩誰遣風塵失少年四壁舊聞懸磬宅
一囊今有賣書錢淋浪別酒青燈夜滅沒孤舟落照邊
想得還家過春半故山喬木滿蒼烟

鎮州與文舉百一飲

翁仲遺墟草棘秋蒼龍雙闕記神州只知終老歸唐主
忽漫相看是楚囚日月盡隨天北轉古今誰見海西流
眼中二老風流在一醉從教萬事休

衛州感事

神龍失水似蜉蝣一舸蒼皇入宋州紫氣已沉牛斗夜
白雲空望帝鄉秋刳前寶地三千界夢裏瓊枝十二樓
欲就長河問遺事悠悠東注不還流

桐川與仁卿飲

瀟瀟茅屋繞清灣四面雲開碧玉環已分故人成死別
寧知尊酒對生還風流豈落正始後詩卷長留天地間
海內斯文君未老不須辛苦賦囚山

十二月十六日還冠氏十六日夜雪

少日騫飛掣臂鷹只今癡鈍似秋蠅
耽書業力貧猶在涉世筋骸老不勝
千里關河高骨馬四更風雪短檠燈
一餅一鉢平生了慚愧南窗打睡僧

寄楊飛卿

客夢悠悠信轉蓬紙窗殷殷動晨鐘
西風白髮三千丈故國青山一萬重
沙水有情留過鴈乾坤多事泣秋蟲
三間老屋知何處慚愧雲間陸士龍

隱亭同麻知幾賦

零落棲遲復此遊一尊聊得散羈愁
天圍平野滿無際水遶孤城閒不流
抑意漸迴淮浦暖鴈聲仍帶塞門秋
登高望遠令人起欲買烟波無釣舟

感興

倚梯從昔望雲霄七葉何人竟珥貂
道路常教車厯鹿功名惟有鬢飄蕭
勤如韓子初無補晚似馮公豈見招
五十三年等閒裏一窗風葉雨瀟瀟

春寒

草木荒城屋數椽春寒間巷益蕭然僮奴樵斃頭如葆
稚女跳梁履又穿白石鯉魚空半尺朱門食客自三千
松枝麈尾山中滿去去南華有內篇

即事

商師國器見免從軍

逋客如今不屬官住山盟在未應寒書生本自無燕頤
造物何嘗戲鼠肝會最指天容我懶鴟夷盛酒盡君歡
到家慈母應相問為說將軍禮數寬

出都

漢宮曾動伯鸞歌事去英雄不奈何但見觚稜上金爵
豈知荆棘卧銅駝神仙不到秋風客富貴空悲春夢婆
行過盧溝重回首鳳城平日五雲多

呂國材家醉飲

世事悠悠殊未涯七年回首一長嗟虛傳庾信凌雲筆
無復張騫犯斗槎去國衣冠有今日春風桃李是誰家
螺臺剩有如川酒暫為紅塵拂鬢華

別周卿弟

晚歲論詩辱見收相從許久重相留苦心亦有益東野
真賞誰如高蜀州萬疊寒雲度歸鴈孤洲春水澹沙鷗
荒城後日思君處風色蕭蕭人白頭

寄叔

星斗龍門姓字新豈知書劍老風塵郎君未省曾開閣
王翰何緣得買隣銀燭對談詞館夜雪梅同醉浙江春
祇應千里東州月處處相逢即故人

夜宿秋香亭有懷本菴英上人

兄弟論交四十年相從旬日却無緣去程冰雪詩仍在
晚節風塵私自憐蓮社舊容元亮酒藤溪多負子猷船
茅齋一夕愁多少窗竹蕭蕭耿不眠

哭樊帥

自倚沉寃有舌存爭教無路叩天閭傾囊已竭千金賜
絕幕誰招萬里魂東道謾悲梁苑客南園多負壽張孫
春風花落歌聲在夢裏能來共酒尊

送樊順之

弓刀十驛岳連州渭水秦山得意秋
王粲從軍正年少
庾郎入幕更風流
寒鄉况味真雞肋
清鏡功名屬虎頭
寄謝溪風亭上月老夫乘興欲西遊

大名贈荅張柬之

營平豪宕變溫文
所見今知勝所聞
只道生涯無長物
爭教詩壘有奇勲
伐薪未敗煩名士
載酒能來過子雲
後日山陽養衰疾
藥籠仙品正須君

柳亭雨夕與高御史夜話

關塞無緣笑語同偶然情話此從容青天蜀道不得過
山色歸心空自濃九日茱萸藍澗酒十年朝馬景陽鐘
三間老屋知何處惆悵雲間陸士龍

贈蕭漢傑

射虎將軍右北平短衣憔悴宿長亭雷轟寶劍無留迹
火借青囊為乞靈四壁不知貧作祟一瓢誰識醉中醒
相逢莫話揶揄石自省枯槎是客星

送曹幹臣

和林音驛日懷思燕市歌歡有此時老我真成鐵爐步
感君時送草堂貲黃楊舊厄三年閏赤驥非無千里姿
平地烟霄付公等不妨閒和鳳池詩

杏花雜詩

暖日園林可散愁每逢花處儘遲留青旗知是誰家酒
一片春風出樹頭

小橋南北夢幽尋殘醉曹騰不易禁一樹杏花春寂寞
惡風吹折五更心

楚客離魂不易招
野春平碧水迢迢垂楊也
被多情惱
瘦損春風十萬條

惠崇蘆鴈

江湖牢落太愁人
同是天涯萬里身
不似畫屏金孔雀
離離花影淡生春

步虛詞

閨苑仙人白錦袍
海山宮闕醉蟠桃
三更月底鸞聲急
萬里風頭鶴背高

萬神朝罷出通明和氣歡聲滿玉京見說人間有新異
綠章封事謝昇平

琪樹明霞碧落宮歌音嫋嫋度冷風人間聽得霓裳慣
猶恐鈞天是夢中

劉鄧州家聚鵬圖

沙浦空明洲景微枯荷折葦淡相依若為化作江鷗去
拍拍隨君貼水飛

無題

春風也解惜多才嫁與桃花不用媒死恨天台老劉阮
人間何戀却歸來

雜著

天上河源地上流黃金浮世等閒休埋愁不著重泉底
儘向人間種白頭

昨日東周今日秦咸陽烟火洛陽塵百年蟻穴蜂衙裏
笑煞崑崙頂上人

半紙虛名百戰身轉頭高塚卧麒麟山間曾見漁樵說

辛苦凌烟閣上人

登珂山寺

淡淡長空白鳥迴江山都入妙高臺
六鼇只解翻溟渤
不見東南日觀來

奉酬子京禪師見贈

舊遊重憶故人詩一點青燈兩鬢絲
不似戒壇明月夜
杏花香裏唱歌時

聊城寒食

輕陰何負探花期白髮於春自不宜城外杏園人去盡
煮茶聲裏獨支頤

南關

風裏秋蓬不自由一生幾度過隆州無情團栢關前水
流盡朱顏到白頭

太一蓮舟圖

太一青藜出漢年明窗開卷一欣然憑君莫問題詩客
不是韓駒第二篇

黃華峪

團團石甕琢青瑤
仰面看雲覺動搖
誰著天瓢灑飛雨
半空翻轉玉龍腰

峽口食鰻魚有感

無奈微雲疎雨何
孟公詩律費研磨
憑君莫愛襄陽好
縮項鰻魚刺更多

三鄉雜詩

夢寐滄洲爛漫游
西風安得釣魚舟
薄雲樓閣兀烘暑

細雨林塘已帶秋

王子文琴齋

天上秋風月底霜求凰一曲鬢絲長相如四壁消何物

直要文君典鸛鴦

留贈丹陽王煉師

信得人間比夢間一卮芳酒且開顏當時笑伴今誰在

詩客淒涼飯潁山

敝盡貂裘白髮新京華旅食記前身仙翁相見休相笑

同是邯鄲枕上人

梁園春

雙鳳簫聲隔綵霞宮鶯催賞玉谿花誰憐麗澤門邊柳
瘦倚東風望翠華

西樓曲

游絲落絮春漫漫西樓晚晴花作團樓中小婦弄瑤瑟
一曲未終坐長嘆去年與君西入關春風浩蕩隨金鞍
今年匹馬妾東還零落芙蓉秋色寒并刀不剪東流水

湘竹年年泪痕紫海枯石爛兩鴛鴦只今雙飛便雙死
重城車馬紅塵起乾鵲無端為誰喜鏡中獨語人不知
欲插花枝泪如洗

王庭筠

黃華山絕句


帝遣名山護此邦千家瑟瑟嵌西窗山僧乞與山前地

招客先開四十雙

瑟瑟寶名山色似之故曰嵌舊唐書南詔以田四畝為一雙

挂鏡臺西挂玉龍半山飛雪舞天風寒雲直上三千尺

人道高歡避暑宮



元藝圃集卷一